

# Khri's' Suangphum

Suangphum Iepkhitsa Ioungal suangphum dang kuamah in a lem theita kei, huai suangphum Jesu Khrist ahi - 1 Kor. 3:11

Vol. XX. No. 03

PRIVATE CIRCULATION

January 16, 2022

## THILPIAK A VUALZAWLNATE

Sutzopna...

- Pauminlun -

### Thilpiak a vualzawlina omte:

Thilpiak ipiak hiam ahikheileh panpih ngaite ipanpih chiang in ithilhihte amawk a mangmailou in vualzawlina tampi in hon zui zel hi. Thilpiak a kipan vualzawlina omte ahiehleh:

1. Thilpiak in Pathian toh hon kinaisak hi- Matthai 25:14-30 a talent gentehna thu ah sikha talent ana zang a ana supungte kiang ah apu uh kampau tuh "Na pu kipahna ah lut in" chih ahi. Talent khat piak a ompan ana supunglou in angeizah mah ana piak nawn ziak in apu thangpaihna atuak hi. Eite le sikha ihihna ah talent piak in I omvek uh. Huai talent piak a I om uh suk pung ding tuh imohpuak uh khat ahi. I talent sukpong ding ichih chiang in thilpiak piakkhiak ding chihna ahi. Talent khat kepsak a ompa bang a zanglou a I omleh Pathian lung kituaklou ding hi. Himahleh thilpiak ahi di bangtak a I piak a panpih ngaite ipanpih chiang in I Toupa kipahna ah kilut a, huai in Pathian toh ikizopna hon hoihsak in kinaisem in hon bawl hi.

2. Thilpiak in Jesu Khri batsemna hon tun hi- Khristian te tuh Jesu Khri nungzuite leh ama omdan latute chihna ahi. Jesu Khri in van a a inn nuamtak nusia a Pathian toh kikim a omlai hong kiawngsak in mihingten hinna aneihtheihna ding ua haksak chiteng thuak a sihna tan hong thuak hi (Phil 2:5-8). Hiai apan in anung izuih Jesu tuh aangmasiallou leh mihingte iit ahihdan hon langsak hi. Panpih ngaite panpih a ahaksatna uapan a huhkhiak tuh Jesu omdan khat ahi. Huai mahbang in, eiten leng panpih ngaite panpih a thilpiak a ihauhsak chiang in Jesu Khri omdan la kisuak hi.

3. Thilpiak in vualzawlina hon tun hi- Mi akipan a thilpiak idon chiang in vualzawlina chikhat himahleh apekhetu a ipan chiang in vualzawlina thupizaw hi. Lak sang in piak ah vualzawlina a omzaw (Nasepte 20:35b). Luke 6:38- "Pia un, huchi in piak in na om ding uh, hoihtak a teh a, hen gak a, sin gak a, let noinoi in na angsung uah piak in na om ding uh. Noumau tehna ngei mah a tehsak a piak in na om ding uh ahingal a." Hiai chaang in apete mah piak a om ding ahihdan hon hilh hi. Mihingten ingaihndan taangpi in, thilpiak ipiakkhiak chiang in ei manna isakha sek a himahleh ipiak chiang a ei punna ana hi ahihdan hiai apan in amuh theih hi. Ipiak khiak chiang in vualzawlina let noinoi a hong lutna ding mun awngsak ihi. Himahleh ipiak chiang a tehna izatmah a tehsak a piakkiik a om nawn ding ihi.

Huai bel, sum tampi nei a tampi pete kiang kia a tampi lut ding chihna kia hilou in anei tawm a aneih toh kikhom a tampi pete aleng tampi lut ding chihna ahi. Ipiakzah toh ki proportionate a piakkik a ki om ding chihna ahi. Huaiziak in thilpiak ipiak chiang in vualzawlina hong lutna ding a mun awngsak ihi chih thei a vualzawlina tam ideih leh tam piakkhiak ding ahi. "Huan, Pathian in hehpihna chiteng in na tung uah avuk thei hi, huchi in nou bangkim ah ahun ngial nei gige in, nasep hoih chiteng a ding in na hau thei ding uhi" II Kor 9:8. Apetu tuh Pathian in vualzawlina atung ah vuk ding hi.

4. Thilpiak in lungsim kipahna(joy) hon tun- Thilpiak ipiak khiak a panpihna khut izaak chiang in isungnung ah kipahna khat hon tut om mawk hi(sappau a Sense of Satisfaction achih uh). Hiai tuh mi kuapeuh, thilpiak pia a mi panpih kha peumah in ituak chiat ding uh. Ei apekhetu a pang a en kipahna nei ichih mawk thil lamdang pi bang hi himahleh Pathian ei mihingten kiphal a panpihna thilpiakte pe dia hon na deih ziak a huai ding mah a ana bawl ahingei ding. Huaiziak in pekhe tam peuh leng ikipahna ding tam ding chihna himai ahi. Jesu Khri in "laak sang a piak in lukhawng anezaw" ana chih in alatu a pan sang a apetu a ipan leh

kipahna lianzaw achih ana dik mahmah hi. Huaiziak in kipahna neitawm ikisak leh thilpiak lam ah kiphal in petam in ikhut tawi liansak leng kipahna in hon zui mai ding hi.

5. Thilpiak in Tanchinhoih puangzaak hi- Khristian ten Toupa ni chiang in thilpiak itawikhawm sek ua huai tuh tanchinhoih puanzaakna in kizang in nna thupitak semkhe thei hi. Ipiak tam chiang in tanchinhoih in abatphakna lian a ipiak tawm chiang in abatphak neu hi. Huaiziak in thilpiak ipiakten Toupa lalgam keekletna a nasatak in poimohna nei hi. ("Thuhillhmi omlou in bangchin aza ding ua? Sawl ahiehkei uleh bangchin thu ahilh ding ua" Romte 10:14-15). Huan, Toupa ni a ipiakte kia hilou in mimal in panpihna khut zaak a mite kiang a thilpiak ipiak chiang in ei tungtawn in Pathian min pahtawi in ana om hi.

6. Thilpiak in Van ah gou hon kholsak hi- Khristian te ading a thil manphapen tuh ileitung hinkhua abei chiang a van a ei ading a mun bawlsak a i om ahi. "Lei a, leikha leh tui ek in a neksiatna ah, gutaten phenvang a agukna uah gou kholkei un. Van ah, leikha leh tui ek in aneksiat louhna ah, gutaten aphen ua aguk samlouhna uah gou kikhol zaw un" Matthai 6:19-20. Eite tuh lei a gou khol keihkoih a om dingte ihikei uh, gou ikhol leh ikholna di mun tuh Van ahi. Van ah gou bangchi khol ding ihi dia ichihchiang in leitung a ithilpiakte tuh van a igou kholna chikhat ahi. Pathian in thilpiak a kiphal ding leh gentheite panpih ding a hon deih ahihman in huaite ihihchiang in van ah igou khol kisuak hi.

Thilpiak a vualzawlina om adang leng tampi om hi. Himahleh huaite gelhkim zoulou ding ihihman in hiai thilpiak a vualzawlina tampi omte itan theihna ding in bang chileng petam thei ding ihia chih I ensuk ding.

### Bang chihle thilpiak petam thei ding ihia?

1. Thilpiak ipiak tam theihna dia poimoh masapen tuh Pathian in hon vualzawlina theihiam ding ahi. Pathian in vualzawlina lam chiteng ah hon pia hi, neih leh lam, sum leh paite kia hilou in I hinna idamna mahmah kepbitsak a om a vualzawlina idonte zangthei ding leh azaal zou kha dia I om tuh thil ahi dimah isak khak ding lahuai hi. Miteng in ei dan in vualzawlina adong kei uh chih itheihsa ahi, huaikia leng hilou in hausa mahmah a hilele ahauhsakna zaal zou khalou a om leng mi tampi om hi. Huaite dinmun a dinglou a tamlua nei hikei mahle hang tasamlou a I om athupidan theih ngai hi. Huaiziak in Pathian in apethei di dinmun a hon koih ahiehleh huai ding a hon muang chihna ahi. Hiai theisiam hile hang thilpiak ah kuamah ikhut aton ngeikei dia thilpiak piakkhiak tam poimoh ahihdan leng ithei ding uh.

**PLACE OF WORSHIP**

Secred Heart Cathedral,  
Yusuf Sadan, Ashoka Road ,  
Delhi - 110001

Phone No. 9953968807  
website : www.cocdelhi.org

**'KHRIS' SUANGPHUM, A WEEKLY BULLETIN FOR  
THE MEMBERS OF THE CHURCH OF CHRIST, DELHI,  
ON THE FIRST DAY OF THE WEEK'**

Enkaitu : Jamson Guite

**BIBLE CLASS**

**Class**

Adult : Khenpi, Siamkhanmuan  
Inter. : James & Jamson  
Junior : Ginsuan & Suanlian  
Primary : Minlun & Niangngaihching  
Beginner : Chingkhanlun & Pauliansiam

**Teacher**

**TOUPA NI  
ONLINE SERMON - 11AM  
NILAINI  
BIBLE CLASS - 9PM**

**THOUGHT OF THE WEEK**

**Aw Toupa, mihing omdan bel, amah thu lel  
ahikei chih ka theita hi: mihing a kalsuan  
amah kipi hilou hi - Jeremiah 10:23**

**THU TUAMTUAM**

**THU TUAMTUAM**

**Online Sermon & Bible  
class Program**

**Toupa' Ni**

**Date 16.01.2022**

Hun-uk thumna : Thangbiakmang  
Thugen : Jamson  
Thupi : **Behold the Pattern**  
Thumna : Thangzalam

**Nilaini Bible class 19.01.2022**

Thumna : Timothy  
Sinsaktu : Di Palma  
Thumna : Khamthianmung

**Toupa' Ni**

**Date 23.01.2022**

Hun-uk thumna : Khamminthang  
Thugen : Lang James  
Thupi : **Behold the Pattern**  
Thumna : Jangthang

**ZIN LEH TUNG**

Insung vai a poimohna khenkhat neih ziaak a Lamka lam a ana pai unaute Thongginlian-te innkuan kal paita ningani in damtak in Delhi hongtung kiknawta uh.

Huchi bang mah in Buangmun leh Lamka lam va pha unaupa Jangthang-te innkuan leng kal paita ningani mah in Delhi hongtung kinauwta uhi.

A khua uh Buangmun va pha unaunu Niangpal leng damtak a hongtung kiknawnta ahihdan zak ahi. Khualgam a va zinkhia unaute damtak a hongtunkik nawn siausiau theih ziaak un i kipak uh.

Kal paita Toupa Ni nitaklam in unaupa Chinlunmang in suti zang diing in Lamka lam ah hon paisan hi.

**NGAPLOU UH**

Kal masa a ngaplou a om unau- pa Chinsuanmung-te innkuan Covid-19 ziaak a ngaplou ana hi ua, tunbel Pathian panpihna toh ahoihlam hita uh.

Unaupa Joseph Pauminthang-te innkuan leng Covid-19 ziaak mah in ngaplou in ana om uhi. Amau leng Pathian ompihna toh a bahsia kuamah omlou in a damlam hita uh.

Unaupa Thangbiaklun-te innkuan leng covid ana vei vek uhi. Amau leng Pathian ompihna toh a lellua omlou ua, tun a damlam hita uh.

Odisha a laizil a kuan unaupa Lunsang in leng huailam ah covid va vei hi. Aman leng Pathian ompihna toh huchipi in gimpihlou hi.

Unaunu Neihnunmawi @Maw- ite leng ngaplou in ana om hi. Amah leng Pathian panpihna toh gimsia lou in hoihlam manoh a theih ahi. Covid bel ana ki test sak tuanlou hi.

Unaunu Lunkhannuam leh Master Thangliansang s/o unaupa Jamson leng khosik, gawlina, sana leh khuh thua in ana om uh. Amau leng a hoihlam hita ua covid bel ana ki test sak tuan selou uhi.

Unaupa Thanglianmang tate Khupmuansang leh Thanglianmuan leng ngaplou in ana om uhi. Amau leng Pathian panpihna toh damsiantga uh.

Damloute'n damna hoihazaw ahon neihziaak un i kipak uh. Tulaitak in Delhi ah Corona vei mi tam mahmah. Kum- dang toh kibangloutak in a veite'n gimpiph lotel lou uhi.

**MEETING OM**

Kal paita sintawpni nitak dak 7 in unaupa Thangzalam inn a Saptuam business meeting neih in om. Hiai hun ah vaipawluite leh a thakte mohpuak- na kipekhia uhi. Saptuam audit 2021 leng etkhawm in om hi.

**Pek khatna sutzopna...**

2. Thilpiak ipiaktam theihna ding a poimoh mahmah nawn khat tuh Itna ahi. Huai tuh Pathian itna leh imihinpihte itna ahi. Paul in I Kor 13:3 ah hichin ana chi, "Huan, migentheite vakna ding in ka sum tengteng pevek in, ka pumpi leng kang ding in hial in kipe mah leng, itna ka neihkei leh kei ding in bangmah aphatuamkei hi". Hiai apan a imu- theih tuh thilhoih ihihna ding ah, thilpiak ipiakna ding ah, panpih ngaite ipanpihna ding ah itna mah ana poimoh masa chih ahi. I iitte ading in thilpiak ipiak Chiang in atawmlam hilou in atampen mah kipia hi. Huai mah bang in, Pathian I it leh ithilpiak atam ding a imihinpihte I it leh panpihna khut izaaktam ding chihna ahi.

3. Igou, ineih ilamte tawngtawn ading hilou ahi chih thei leng thilpiak ah ikiphall ding. "Min khovel apum in nei henla, ahinna tan leh amah ading in bang aphatuam dia?" Matthai 16:25. Hiai apan in ineih leh lamte isih nung Chiang a azatna di bangmah omlou ahihdan amuhtheih. Mihing teng khatveitei si vek ding ihi chih itheihsa ahi. Himahl- eh isih hun ding athei kuamah I omkei. Hunteng a I hinna beitheih gige ahi chih thei in hinkhua zang hileng hang hiai leigoute pammaih sa tuntun a iit vungvung ki om din agintak huaikei. Huaiziak in hiai lei thilte tangtawn daih ding omlou ahi chih thei le hang ithilpiak atamlam kipe ding hi.

4. Pathian in thilpiak atawm lam hon ngiat ngeilou himhim ahi chih theih ding ahi. Abraham kiang ah atapa tang neihsun ana ngen a, gan kithoihnate ahoihpente ana ngen hi. Huai mah bang a tuhun in leng atawmlam, achingzoulou lam akipahpih agintak huaikei. Huaiziak in Pathian in ahoihpen, atamtheipen deih gige ahi chih thei lehang thilpiak tam kipe ding hi.

Atawpna ah, "Kimanna pen a omphot leh mi aneihlouhpi hilou in, aneih bangzel a apiak kipahpihtuak ahi" II Kor 8:12 chi a agen bang in Pathian in ineihloupi hon lamem hilou in ineih bangzel a kiphaltak leh kipaktak a atam theilam ipiak hon lamem a huaidan ki- pahpih ahi chih leh ei hamphatna ding mah a thilpiak kipia ahi chih thei in Pathian mittung ding in thilpiakte pia in panpihna khut zaak zel ni. Khovel ah kuamah thilpiak petamlua a sihlou om nailou ahi. Khristiante tuh thilhoih hih ding a Khris a siam a omte ihi(Eph 2:10).